

## Lesson 99

### Ine pa'innu sabab si Isa?

#### *Bahagi' 1*

Assalamu alaikum me' bagayku mapakalehin. Tiya' ku katakdilan we' Tuhanin magaka-aka si ka'am. Iye Tuhan po'on kasanyanganin. Kabaya'annen, we' kēmon me' a'ahin tasabutde duk maglilla' nuhut lān bakas minemesnen, supaya a'ahin makajari kinimatan bentel we' ne duk supaya siye sinakup dem kasanyanganne te'edin salama-lama. Sinna kami we' makajari kami magpakale balik si ka'am ellew inin programabi inēnan “*Lānin duk a'ahin manjari bentel si matahan Tuhan*”.

Tiggel ne bakas istadihante bi Kitab Kanabihanin supaya kata'uhante bi lān minemes we' Tuhan mekebentel me' a'a si matahannen. Bakas kitete we' tumanan Isa AlMasi lapal me' nabihin. **Ellew inin duk si lesson mapaturulin**, niat kamihiin magsumbaya' kite bi magbalik sabab dembuwa' mabangsahan bakas binissā we' kēmon me' nabihin. Hangkan me' duwe lessonte si katambusan pagistadite magturul-turul dem Kitab Kanabihanin inēnan, “**Ine pa'innu sabab si Isa?**”

Dem pagistadite dem Kitab Injilin bakas takaleta we' tilew si Isa me' a'ahin, pa'inne, “***Ine pa'inbi sabab AlMasihin, tubu' sine iye?***” (Mateo 22:42) Inin panilew importante manamalin subey sinambungan we' te bi dangan-dangan si ka'ellumte pe. Sambungten si panilew inin iye mamugtu'in bang intag pala'ihanten si ahilat! Ga'i ne tiggel pitu balik Isa AlMasi, duk bang pitu iye, tilewne kew iyan kuwe' bakas panilewne me' a'a masaley, pa'inne, “Bang ka'u, ine pa'innu sabab aku?”

Mabaya' te'ed kami maginta'u ka'am bang sine te'ed si Isa. Tinalew kami, kaw niya' meketimbo'o ka'am si lān seddili sabab inin. Sege'-sege' kami ka'am, da'a pa'in tapikilbi we' si Isa dembuwa' me' nabi hadja, atawa we' a'a hāp hadja iye. Duma'in, **tinggal du iye dendangan!** Ga' niya' sali'ne tu'u si dunya kuwe'itu inin atawa si dunya si pesōnganin. Ine pa'innu sabab iye? Ine pa'innu we' sine iye? Niya' sempū' panilew, mabaya' tilew kami si ka'am sabab Isa AlMasi, lime panilew si lesson inin duk lime si lesson mapaturulin.

#### **1.) Ka'issa', ine pa'innu sabab panganak iye meke'ulali'in?**

Ga' niya' bakas inanakan kuwe' iyehin. Si Isa, *Anak Mariyam* iye. Kata'uhanbi we' Nabi Yahiya inēnan *anak Jakariya*, Sultan Sulayman

inēnan *anak Nabi Da'ud*, Isma'el inēnan *anak Nabi Ibrahim*. Kēmon a'a hinangde apiliduden ēn samaden, atawa tambahande ēn samaden si di ēnde. Saguwa' bang si Isa, we'ey tinambahan ēn sa'inen si ēne? Jānnen, pegge' ga' niya' samane manusiya'. Inanakan iye we' dembuwa' budjang. Inanakan iye sabab balakat Tuhanin. Me' pitu' hatu' tahun dehellu amban inanakan AlMasihin, pina'al we' Nabi Shi'ya bang sa'ingge iye inanakan, pa'inne, “*Niya' iyan budjang betteng duk nganak iye lella duk inēnan du iye Immanuel (hātinen, ‘Tuhanin palamud si kite bi’)!’*” (Shi'ya 7:14; Mateo 1:23)

Pinapanjari kapapu'anten bi Apu' Adam we' Tuhanin amban bulak. Kēmon kite bi tubu'an Apu' Adam, duk me' nabihin, iye du. Amban dunya kite bi. Saguwa' Panuhutanin si Isa pitu iye amban surga'. Kēmon kite bi lemme' kuwe' bulak sabab duseten bi, saguwa' si Isa kuwe' ulan pitu amban diyata' langit. Limpuyu iye duk sutsi, sa Tuhanin limpuyu duk sutsi. Inakahan kite dem Kitab Injil, pa'inne: “*Pitu Isa AlMasi si dunya supaya tatimbulne me' a'a dusehanin.*” (1Timoteo 1:15) Pag ga' pe pitu si Isa si dunya, la'i iye si pana'anan Tuhanin, pegge' iye Lapal Tuhanin duk Niyawa Tuhanin. Amban di kabaya'anne pene'ne pitu si dunya magbaran manusiya' supaya kite bi timbulne amban duseten bi. Pitu iye amban diyata'.

Niya' istori sabab duwe lella labo' diyalem kupung lalem. Missā dembuwa'in si sawe'nen, pa'inne, “Hoy sawe', timbulun ku amban lugal mala'at inin! Paluwasun ku amban pisak lenang inin!” Saguwa' nambung sawe'nen, pa'inne si iye, “Babbal kew, sa'ingge kew makajari paluwasku bang kaduwangan kite tu'u dem lowang inin?!” Kaduwangan siye la'i, duk ga' si iye makajari nabang sawe'ne maluwas. Ubus niya' takaleda suwala amban diyata', ngakahan siye, we' subey siye ngaput diyata' ingket pinatuntun dem kupungin. **Luwal a'a mangga' malabo' dem kupungin, makajari manabang siyehin.**

Bisan me' nabi mahāp manamalin ga' kite bi tatimbulde amban lowang duse malalemin, pegge' a'a dusehan du isab siye. Saguwa' bang si Isa, ga' iye kapusaka'an disaline magduse kuwe' manusiya'in. Pitu iye **amban diyata'**. Inanakan iye we' budjang. Bakas takitete isab we' pinapī we' Tuhanin mala'ikatnen, duk bettadne pote'an meke'ulali'in diyata' langit supaya minahalayak panganak pu si AlMasi masutsihin, Manimbul dnyahin! Kēmon iyan meke'ulai' te'ed! Ga' niya' a'a inanakan kuwe' lella inin. Tinggal du iye dendangan inanakan sa miya'anin. Ga' niya' sali'ne! Saguwa' duma'in hadja panganak pu si Isahin meke'ula'i duk magpakite bangsahannen. Tinggal du isab iye dendangan ga' niya' sali' addatnen. Hangkan panilew kami kaduweenen, inin:

## 2.) Ine pa'innu sabab addatne masutsihin?

Bang si Isa ga' niya' salla'-salla'ne. Ga' iye bakas magduse bisan mintedde. Ga' iye nesessita māku ampun, pegge' ga' iye bakas magduse

bisan pu sine. Kēmon a'a bisan bang matalew si Tuhanin, subey magsusun sabab dusenen duk māku ampun. Kēmon me' nabihin masi du māku ampun. Saguwa' makajari pihanu dem Lapal Tuhanin amban tagna' pī si katambusan, saguwa' ga' niya' takasuwa'nu bisan dembuwa' ayat magpa'in we' Panuhutanin si Isa māku ampun. Ga' nessesita we' māku ampun iye pegge' **ga' iye bakas magduse**. Me' bagaynen duk bisan me' bantanen naksi' we' ga' niya' takasuwa'de si iye bisan dembuwa' sala'ne. Me' bagayku, ga' niya' seddili ga' niya' dusene. Panuhutanin Isa AlMasi pesōng amban nabi. Iye te'ed Lapal Tuhanin palahil si dunya magbaran manusiya'. Awe', tinggal iye dendangan ga' niya' sali' addatnen. Ga' niya' sali'ne! Saguwa' niya' pe importante subey tasabutte. Si Isa tinggal du isab dendangan ga' niya' sali' bissānen.

### 3.) Ine pa'innu sabab bissānen?

Dembuwa' ellew da'ak me' bantanen me' sundaluhin pī niggew iye. Tekka siye la'i takalede pagtolo'nen, ubus balik siye pī si amuden bu ga' iye siggewde. Magulali' siye, pa'inde, “*Ga' te'ed niya' a'a bakas magtolo' kuwe' panolo' a'a miya'an!*” (Yahiya 7:46)

Pikilun me' pina'in si Isa sabab dinen, pa'inne, “*Aku inin danta' mangurung danta' dem pikilan manusiya'in. Sine-sine nuhut aku, salama-lama ga'i ne te'ed iye lumengngan dem lindem, pegge' la'i dem pikilanne danta' makapakellum manusiya'in.*” (Yahiya 8:12) Me' nabihin kuwe' dalil bulan duk me' pote'an ngurung danta' ku'ahat dem kalindeman. Saguwa' si Isa kuwe' dalil mata ellew. Ga'i ne te'ed nesessita si kite bi danta' bulanin atawa danta' pote'anin bang paguwa' ne mata ellewin! Pinagsali' we' me' nabihin AlMasi duk mata ellewin. (Mal'aki 4:2) Bulanin ngadiki' kuwe' me' nabihin. Saguwa' Isa AlMasi kuwe' mata ellewin. Bakas takitenu ke we' ngadiki' mata ellewin? Ga' du, ga'i du ngakulang duk tahala'. Ngurung danta' ellewin si kēmon lahat dem dunya. Isa AlMasi kuwe' mata ellew. Ga'i iye tahala', para si kahāpan kēmon bangsa dem dunyahin.

Pa'in si Isa isab, “*Aku inin lān tudju Tuhanin, aku po'on sasuku mabennalin, duk aku po'on umulin.*” (Yahiya 14:6) Seddili manamal si Isa amban me' nakura' āgamahin. Nakura' āgamahin nganda'ak hadja siye, pa'inde, “*Hinangun inin, tuhutun panolo' inin. Inin lānin. Tuhutun me' panganda'akan inin....*” Pa'in Panuhutanin si Isa, “*Aku lānin. Kahagad ka'am si aku, pitu ka'am si aku, ubus bu niya' kapatutbi patenna' si harapan Tuhanin salama-lama.*” **Si Isa dihananne Lānin**. Pahātite inin duk istori-istori.

Manjari, niya' nakanak lella diki'-diki' pe lepas dem puweblo hadje. Makatabang nakanakin si dembuwa' pulis mekepanolo' lān mabalik tudju kaluma'anden. Pa'in pulisin si iye, “*Mentel kew binna'an, si pidjū kaduwenen pī kew tudju bibangan, ubus si katellu pidjūnen pī kew tudju kanawanan, pabutas kew amban puwente, ubus niya' likung si*

kalsara duk tuhutun kalsara hadje kaduwenen.....” Tumāring nakanakin. Pinahātihan iye lānin we' pulisin, saguwa' ga' ta'essebne kēmon duk tinalew iye nuhut me' bakas pinahātihan si iyehin. Manjari, niya' tekka lella amban kaluma'an nakanakin. Antanne tangan nakanakin duk tundanne iye. Pag pekkeng nakanakin lumengngan, pippine iye samanta'an ga' siye tekka si luma'. Pulisin **magpahāti lānin**. Saguwa' lella dembuwa'in iye ne **lānin**. Pa'in si Isa: **Aku lānin**. Aku lān tudju surga'in, tudju luma' Tuhanin. “*Aku lān tudju Tuhanin, aku po'on sasuku mabennalin, duk aku po'on umulin. Ga' niya' tapī si Samaku Tuhanin bang duma'in aku palabeyannen.*” (Yahiya 16:6) Ga' niya' a'a missā kuwe' Panuhutanin Isa AlMasi! Tinggal iye dendangan. Ga' niya' salī'ne! Saguwa' bangsahan si Isahin duma'in hadja takitete si panganak iye, si addatne duk si bissāne. Takitete isab bangsahannen si hinanganne.

#### 4.) Ine pa'innu sabab me' hinangan si Isa mabalakatanin?

Tahinangne kēmon-kēmonin. Pangurung si iye kēmon balakat duk kēmon kapatut. Ine-ine tahinang Tuhanin, tahinang si Isa isab tu'u si dunya, supaya tapakitehanne me' a'ahin bang amban iye duk bang sine iye. Ga' niya' ta'u mateddo' baliyuhin, luwal du **Tuhanin! Si Isa** pateddo'ne baliyuhin. Ga' niya' ta'u magpakellum a'a mamateyin, luwal du **Tuhanin! Si Isa** pakellumne mamateyin. Ga' niya' ta'u ngaluka mata mapessekin, luwal du **Tuhanin!** Tahinang isab iyan we' **si Isa**. Pakawuli'ne bayu'-bayu'an sakihin. Missā hadja iye de tegtang, lahi ne me' seyitanin. Ekka tapindane parasahan me' a'ahin duk timbulne siye amban duseden. Me' nabi sinduwehin inurungan balakat we' Tuhanin ngahinang hinangan meke'ulali' sinduwe. Saguwa' Panuhutanin si Isa hinangne hinangan meke'ulali'in sabab di kapatutnen duk di balakatnen. Makajari iye nengge si bihing a'a mamatey barannen, mayam deretso si iye duk pa'inne; “*Donga' kew. Bo'ohun pabākannun bu nu ne hap luma!*” (Lukas 5:23) Donga' a'a masakihin, duk hap luma' iye, mudji-mudji Tuhanin! Magpakole' si Isa ga' ngangguna tambal atawa tawal. Pakole'ne a'ahin sabab balakat duk kapatut bissānen hadja.

Niya' a'a inēnan Lasarus matey duk kinubul. Pag tekka si Isa, Lasarus la'i ne dem kubul ampat bahangi. Pī si Isa hap kubulne duk pa'inne, “*Lasarus, paguwa' kew pitu!*” (Yahiya 11:43) Paguwa' bangkeyin amban dem kubul. Niya' kapatut si Isa magpakellum mamateyin, hangkan makajari pa'inne, “*Aku magpakellum me' pateyin duk aku po'on umulin!*” (Yahiya 11:25) Tekka du iyan waktuhin bang takale kēmon dem kubulin suwalanen, donga' siye duk nengge si harapanne. Bagayku mapakalehin, paguwa' du kew isab iyan amban dem kubul bang ubus ne kew matey. Bisan kuwe'itu, ta'urungan Panuhutanin kew, si Isa, umul ba'ahu duk kapatut ellum si surga' salama-lama, bang kew kahagad si iye we' iye du Manimbul ka'uhin duk Panuhutannun. Sampay kuwe'itu ekka

tapinda si Isa parasahan me' a'ahin dem kēmon dunya. **Makajari isab pindane parasahannun.** Ine pa'innu sabab si Isa? Ine pa'innu sabab hinangannen? Tinggal iye dendangan. Iye mabalakatanin. Ga' niya' sali'ne! Niya' pe dembuwa' panilew kami sabab si Isa si ka'u ellew inin:

### 5.) Ine pa'innu sabab me' ēnnen duk gellanen?

Bakas takitete ne dem Sulat Kanabihanin, we' hatusan ēn duk gellal si Isahin. Me' ēn inin nabangan kite bi supaya pesōng tasabutte bang sine iye. Upama, inēnan iye: *Immanuel...Lapalin...Anak Manusiya'...Bili-bili Tuhanin...Mangalekkatin.... Manimbulin...Kinakan meke'ellumin...Po'on Bāhan Tinanem mahāpin...Mangipat Bili-bili mahāpin....Danta' Dunyahin... Mangantanah Sahayahin....Magpakellum me' pateyin....Dehelluhin duk Dambulihin, Tagna'in duk Panambusanin .... Gawangin ...Lānin, Po'on Mabennalin, Po'on Umulin...duk **Anak Tuhanin!***

Bakas takitete we' Nabi Musa inēnan a'a Tuhanin. Nabi Ibrahim inēnan bagay Tuhanin. Saguwa' luwal hadja dembuwa' a'a inēnan **Anak Tuhanin.** Akahanun kami, bang sine matapit si a'ahin, bagaynen ke atawa anaknen? Magaka kew mabennal diyalem ateynun. Awe', si Isa inēnan Anak Tuhanin. Inēnan si Isa we' Tuhanin Anakne pegge' mabaya' iye pagbidda'ne amban kēmon sinduwehin. Bakas takalet dem Kitab Injil we' pa'in Tuhanin sabab si Isa, pa'inne, *“Inin Anakku kalasahanku te'ed. Kasulitan ku te'ed si iye. Pakalehun bi iye.”* (Mateo 17:5) Ine hāti pina'in Tuhan inin? Bang petekka pina'in we' anaknen lingu samanen. Takite bentuk samanen si anaknen. Magpakite si Isa bang sa'ingge Tuhanin. Iye pina'in dem Kitab pag pa'inne: *“Ga' niya' bakas ngite Tuhanin. Saguwa' pinakata'u Tuhanin si manusiya' we' Anakne dambuwa'-buwa'in, pegge' asal Tuhan du iye duk magdambuwa' iye duk Samanen.”* (Yahiya 1:18) Mabaya' ke kata'uhannu Tuhanin duk magtuhut duk iye salama-lama? Bang iye kabaya'annun, pitu kew si Panuhutanin si Isa, inēnan we' Tuhanin Anaknen. Anaknen makajari missā ganti' samanen. Iye hep miya'an hininang si Isahin patu'une si dunyahin. Iye jānnen hangkan iye inēnan Immanuel hātinen **Tuhanin palamud si kite bi.**

Niya' a'a kannalde we' ga'i makajari Tuhanin pitu si dunya magbaran manusiya'. Saguwa', kēmon makapikil sa miya'an ga' pe tasabutde palanu Tuhan hininangne pagtimbul madusehanin. Dem gara'ne inin Anak Tuhan Salama-lamahin subey palahil si dunya magbaran manusiya', supaya pakata'une dinen si me' tubu'an Apu' Adam, duk supaya siye lekkatne amban dem antanan Nakura' Seyitanin. Me' bagayku, **balakatan Tuhanin** duk tahnangne bisan ine-ine. Mabaya' Tuhanin we' kēmon a'a ngata'uhan iye. Hangkan magbaran manusiya' iye duk ellum tu'u si dunya.

Ine pa'innu sabab me' ēn duk gellal si Isa AlMasihin? Ga' niya' sali'ne. Ine pa'innu sabab panganak iyehin, addatnen, bissānen duk

hinangannen? Ine pa'innu, sine iye? *“Ine pa'inbi sabab AlMasihin, tubu' sine iye?”* (Mateo 22:48)

Na, padeheng ne kite bi kuwe'itu. Bang amban kahandak Tuhanin, si lesson mapaturulin niya' pe tilew kami lime panilew sabab si Isa duk niya' isab sambung kami.

Karayaw iledjiki'an ka'am sasangbi mikil-mikil sabab ayat amban dem Kitab inin, pa'inne:

*“Tipun la'i pu si Isa kēmon addat duk pikilan Tuhanin; duk ka'am iyan, pegge' lu'u ne si ka'am AlMasi, tepe si ka'am isab sasuku maniya' pu AlMasihin.”* (Kolossa 2:9,10)

Wassalam